

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XIX)2

**SOALAN BERTULIS OLEH AHLI KAWASAN PENAGA
YB. MOHD YUSNI BIN MOHD PIAH**

2. Mohon nyatakan apakah pelan serta rancangan masa depan dalam pembangunan masyarakat Melayu Islam di Pulau Pinang?
 - (a) Status pembangunan tanah wakaf
 - (b) Pelan pembangunan pendidikan

**YB. DATO' IR. HAJI AHMAD ZAKIYUDDIN BIN ABD. RAHMAN
MENJAWAB BAGI PIHAK Y.A.B. KETUA MENTERI**

2. Dalam membangunkan semua lapisan masyarakat di Negeri Pulau Pinang, Kerajaan Negeri bukan sahaja memberi tumpuan kepada aspek pembangunan fizikal tetapi juga pembangunan sahsiah supaya wujud masyarakat yang seimbang dari segi rohani dan jasmaninya. Setiap tahun, Kerajaan Negeri memperuntukan sejumlah perbelanjaan bagi tujuan pembangunan yang merangkumi semua lapisan masyarakat termasuk Melayu Islam. Pelbagai program dan projek telah dirancang, antaranya ialah Projek Khas Ekonomi yang meliputi Program Pembaikan Rumah Rakyat Termiskin, Program Peningkatan Ekonomi Golongan Miskin/ Pembangunan Industri Desa (Bantuan Peralatan), dan Program Pembangunan Modal Insan kepada golongan miskin. Program sedemikian terbukti dapat membantu golongan sasar keluar dari garis kemiskinan di mana 80% terdiri daripada orang Melayu. Selain itu, Jabatan Hal Ehwal Agama Islam (JHEAIPP) diberi peruntukan oleh Kerajaan Negeri berjumlah RM12 juta pada tahun 2018 bagi tujuan membina dan menaik taraf infrastruktur seperti masjid, surau,

Sekolah Agama Rakyat (SAR) dan Maahad Tahfiz Negeri. Manakala di bawah program pembasmian kemiskinan melalui program Agenda Ekonomi Saksama sejak tahun 2009 Kerajaan Negeri memberi bantuan kewangan bulanan secara *top-up* kepada individu/keluarga yang mempunyai pendapatan per kapita RM220. Setakat Jun 2018, seramai 1,117 orang miskin telah mendapat manfaat daripada Program Agenda Ekonomi Saksama (AES) dengan jumlah perbelanjaan sebanyak RM29,586,722.00 dan 80% daripada penerima bantuan ini adalah Melayu Islam.

Kerajaan Negeri turut memperkenalkan Skim Pinjaman Harapan (SPH) Negeri Pulau Pinang yang dahulunya dikenali sebagai Projek Titian Saksama Rakyat (PTSR) dan skim seumpama ini akan diteruskan bagi mengurangkan kemiskinan melalui program mikrokredit yang memberikan pinjaman tanpa sebarang cagaran dan penjamin kepada peniaga-peniaga kecil untuk membantu usahawan tempatan, penganggur dan golongan miskin termasuk dari golongan Melayu Islam untuk menceburi bidang perniagaan.

Selain itu, Kerajaan Negeri turut memperkenalkan Tabung Usahawan Tani (TUT) yang sebelum ini dikenali sebagai Tabung Usahawan Tani Muda (TUTM) yang memberi dorongan kepada golongan belia termasuk Melayu Islam untuk menjadikan sektor industri asas tani sebagai kerjaya dan berpotensi sebagai punca pendapatan yang lumayan.

- (a) Kerajaan Negeri melalui Majlis Agama Islam Negeri Pulau Pinang (MAINPP) telah melaksanakan rancangan pembangunan tanah wakaf secara berterusan dengan tujuan memelihara kepentingan ekonomi serta kebajikan masyarakat Melayu Islam Pulau Pinang. Bagi tempoh 2011 hingga 2018 MAINPP telah berjaya membangunkan sejumlah 373 unit kediaman dan 13 unit komersial di seluruh negeri Pulau Pinang. Pada tahun 2018 sahaja, MAINPP telah berjaya menyempurnakan dua (2) projek perumahan iaitu 68 unit kediaman bagi projek Pangsapuri Wakaf Muhamed Hashim di Seberang Jaya dan 77 unit kediaman dan 4 unit komersial bagi projek Pangsapuri Siti dan Hajjah Norijah di Sg. Nibong.

Tambahan itu, terdapat juga projek perumahan yang sedang dalam pembinaan dan dalam perancangan untuk dibangunkan yang merangkumi 4,450 unit kediaman dan 181 unit komersial

Selain membangunkan projek kediaman dan komersial, tanah wakaf juga dibangunkan dengan projek seperti pembinaan sekolah agama, dewan serbaguna, perumahan khas untuk asnaf zakat, rumah transit atau pusat sehenti saudara baharu (muallaf) dan pembinaan hospital Islam.

- (b) Manakala di bawah pelan pembangunan pendidikan pula, keperluan dalam meningkatkan mutu Institusi Pendidikan Islam selaras dengan slogan "Ke arah Pendidikan Berkualiti dan Berkat" yang terkandung di dalam Pelan Pendidikan 2017 – 2021 JHEAIPP telah dilaksanakan. Di antara intipati yang terkandung di dalam pelan tersebut adalah seperti berikut:-

- (i) Penubuhan Majlis Muafakat Pendidikan Islam

Dipengerusikan oleh Pengerusi Jawatankuasa MMK Agama Islam dan dianggotai oleh Pengarah JHEAIPP, Pengarah Pendidikan Negeri, Pengerusi Jawatankuasa Pendidikan MAINPP dan pengerusi Majlis Guru Besar Tadris, Majlis Pengetua Tahfiz, Majlis Pengetua SMAR & SABK, Majlis Guru Besar SRAR, Pengerusi Ikatan Guru dan Penyelia KAFA dan Majlis Tuan Guru Pondok. Majlis ini bertujuan meneliti dan menasihati Kerajaan Negeri bagi penambahbaikan serta pemantapan perkara-perkara dasar yang menyentuh aspek pendidikan Islam di Pulau Pinang secara menyeluruh.

- (ii) Penstrukturan Semula Bahagian Pendidikan

Dari semasa ke semasa melihat keperluan untuk menyemak semula skim perjawatan bahagian pendidikan memandangkan adanya pertambahan institusi-institusi pendidikan yang diletakkan di bawah kawalan bahagian ini di mana tugas penyeliaan dan perlaksanaan bidang tugas menjadi lebih luas.

(iii) Pemantapan Kelas-Kelas KAFA

Mewujudkan persekitaran yang kondusif di mana guru memainkan peranan sebagai fasilitator pembelajaran dan pelajar dapat mengembangkan kemahiran sendiri yang diperlukan untuk ke peringkat pembelajaran yang lebih tinggi.

(iv) Kerjasama di antara Pihak Kolej Islam Antarabangsa Pulau Pinang (KITAB) dan Sekolah-Sekolah Agama

Bagi memastikan kesinambungan dan perkembangan ilmu, para pelajar di Sekolah-Sekolah Agama diberi keutamaan menyambung pengajian di Kolej Teknologi Antarabangsa Pulau Pinang (KITAB). Sehubungan dengan itu, satu Memorandum Persefahaman (MoU) antara pihak KITAB dan Sekolah-Sekolah Agama di seluruh negeri Pulau Pinang telah dipersetujui bersama bagi tujuan tersebut.

(v) Naiktaraf dan Pembinaan Baru Sekolah Agama;

Kerajaan Negeri menyediakan sejumlah peruntukkan setiap tahun bagi tujuan menaik taraf dan membina baru sekolah agama yang usang. Umpamanya, pada tahun 2018 sebuah sekolah iaitu Sekolah Agama Masjid Daerah Seberang Perai Selatan dijangka siap pembinaannya dan dua buah sekolah agama pula dijangka akan dibina iaitu Sekolah KAFA Masjid Abdullah Fahim, Kepala Batas dan Sekolah Agama Rakyat Masjid Tuan Guru, DTL. Kesemua sekolah ini dijangka dapat menampung hampir 900 orang pelajar.

(vi) Pemeraksanaan Bidang Tahfiz Al-Quran

Pemberian sumbangan kepada para hafiz Al-Quran telah dimulakan pada tahun 2008 dan akan diteruskan sebagai tanda penghargaan kepada para Huffaz yang menunjukkan kesungguhan untuk memartabatkan serta memelihara kitab suci Al-Quran. Disamping itu, pihak JHEAIPP juga terus bekerjasama dengan agensi-agensi yang berkaitan untuk

memastikan keselamatan bangunan-bangunan sekolah tahfiz di seluruh negeri Pulau Pinang diberi perhatian.

(vii) Kerjasama Berterusan Dengan Pihak JAKIM.

Mengadakan kerjasama dengan Cawangan Pendidikan Islam, JAKIM dalam memantapkan dasar pendidikan Islam yang melibatkan pengurusan KAFA dan pengurusan Sekolah Agama termasuk pengurusan pondok dan tahfiz.

Kesimpulannya, Kerajaan Negeri melalui JHEAIPP dari semasa ke semasa terus memberi perhatian kepada keperluan terkini dalam menambahbaik pelan pendidikan Islam di Pulau Pinang dengan mengambil kira akan keperluan – keperluan baharu atau mengemaskini yang sedia ada supaya selaras dengan peredaran semasa.